

宋詩抄初集

劍南集
止齋集

下



秋夜思南鄭軍中

五丈原頭刀斗聲秋風又到亞夫營
簪如埋劍常思由今作閒雲不計程
盛事何由觀北伐後人誰可繼西平
眼昏不禁陳編得挑盡殘燈不宵明

幽興

蘭渚前頭湖水清了無俗事敗幽情
雨淋茅屋隨時補日射油窗特地明
庭樹晚鶯窺戶語鄰園秋筍過籬生
芥菰漸美鹽醯足誰供貧家一釜羹

法雲僧房

八十衰翁有底忙水邊山際亦徬徨
清溪橋斷舟橫岸小塢梅殘雨漬香
數點青燈經野市一爐軟火宿僧房
自嫌尚有人間意却爲春寒怯夜長

對酒

密篠持苫屋寒蘆用織簾
斃肩柴熟爨

東坡煮猪肉訣云淨洗鍋少著水柴

頭爨煙
焰不起

蓴菜豉初添黃甲如盤大紅丁似蜜甜
街頭桑葉

落相喚指青帘

雨夜起行室中

老疾逢秋體自輕披衣暫起繞牀行
隙風不斷燈將滅簷雨如傾階欲平
鰥叟何嘗愁枕冷病夫未免待窗明
拂書洗硯龜堂上幽事誰知日有程

閏月辛酉壬戌連日風雨癸亥早晴

殘雨在簷猶點滴斷雲銜日正蒼涼
清愁偏向暮年覺少睡不禁秋夜長
簾影漸生禽語樂杵聲初動藥塵香
諸兒作吏俱安否那得棄風至汝傍

予諸子伯叔季皆出仕

偶與客話峽中舊遊

我昔旅遊秋雨細建平城東門欲閉主人迎勞語蟬聯小
婦春炊縞衣袂長年三老半醉醒蜀估峽商工算計須更
燈闇人欲眠泊船卸馱猶相繼山淡水險近蠻獠往往居
民雜椎髻卽今屈指四十年懷抱淒涼真隔世

客中作

江天雨霽秋光老野氣穿雲淨如掃投空飛鳥雜落葉極
目斜陽襯衰草平沙爭渡人鵠立長亭下馬障泥溼纍纍
紅果絡青篾未霜先摘猶酸澀客中雖云貪路程買薪糴
米常留行茆簷獨坐待童僕不聞人聲聞磴聲

遊近村

行歷茶岡到藥園却從釣瀨入樵村半衰半健意蕭散不

雨不晴天晏溫薯蕷傷籬寒引蔓菖蒲絡石瘦生根參差
燈火茅簷晚童稚相呼正候門

客從城中來

客從城中來相視慘不悅引杯撫長劒慨歎胡未滅我亦
爲悲憤其論到明發向來酣鬪時人情願少歇及今數十
秋復謂須歲月諸將爾何心安坐望旄節

村興

結宇楓林下久窮吾所安村淡事自簡累少食差寬雨闇
牛眠屋泥深鴨滿闌呼兒擣粉餌準擬賽鄰官

秋晚書懷

頽然兀兀復騰騰萬事惟除歎未曾無奈喜歡閒弄水不
勝頑健遠尋僧喚船野岸橫斜渡問路雲山曲折登却笑

吾兒多自在夜分未減讀書燈

夢中作

繫馬朱橋上酒樓樓前數水拍堤流
春風又作無情計滿路楊花輓雪毬

大慶橋頭春雨晴行人馬上聽鶯聲
祥符西祀曾迎駕惆悵無人說太平

初冬絕句

鱸肥菰脆調羹美麴熟油新作餅香
自古達人輕富貴例緣鄉味憶還鄉

道途冬暝衣裘省村落年豐鼓吹喧
下麥種麴無曠土壓桑接果有新園

卽事

雲起山容改潮生浦面寬寒鴉先雁到烏桕後楓丹年邁
孤裝帽時新豆搗糲非關嗜溫飽更事耐悲歡

遜居無外事白日不勝長詩爲窮差進琴雖老未忘映窗
精試墨閉閣苦畱香年少無相誚功名事更狂

題詹仲信所藏米元暉雲山小幅

俗韻凡情一點無開元以上立規模鏡湖老監空揮淚想
見楚江清曉圖

徽宗見元暉楚江清曉圖大加賞歎

一棹朝南暮北風奇峰倒影綠波中定知漸近三山路認
得漁翁是放翁

雜興

此身漂蕩等流槎又向江村送歲華急雨遇寒凝作雪明
燈無炮結成花座懸鏡古森毛髮甌聚茶香爽齒牙況是

貧家多樂事阿開漸學手吒叉

稽山行

稽山何巍巍浙江水湯湯千里亘大野勾踐之所荒春雨
桑柘綠秋風秔稻香村村作蟹蝦處處起魚梁陂放萬頭
鴨園覆千畦薑春碓聲如雷私債逾官倉禹廟爭奉牲蘭
亭共流觴空巷看競渡倒社觀戲場項里楊梅熟采摘日
夜忙翠藍滿山路不數荔枝筐星馳入侯家那惜黃金償
湘湖蓴菜出賣者環三鄉何以共烹煮鱸魚三尺長芳鮮
初上市羊酪何足當鏡湖瀦衆水自漢無旱蝗重樓與曲
檻漱灑浮湖光舟行以當車小繖遮新粧淺坊小陌間溪
夜理絲簧我老述此詩妄繼古樂章恨無季札聽大國風
泱泱

病後作

骨相坐一寒仕宦經百謫晚入文昌省又坐煩言噴詔書
復收召付以大典冊期年甫奏篇皇恐亟自劾歸來稽山
下三食新穫麥草屨布裙襦徒步老阡陌今年疾屢作怳
若將歸客道士言犯土拜章安舍宅巫言神去幹剪紙招
魂魄把臂忽自悟此豈屋漏脉盡去囊中藥默觀鼻端白
正氣徐自還鬼子何足磔

道院雜興

征途暗盡舊貂裘歸臥林間喜自由體倦尚憑書引睡心
安不假酒攻愁丹爐弄火經年熟竹院聽琴竟日畱今日
理髯還一笑白間時有黑絲抽

早歲知聞久已空歸然猶有灞城翁東樓誰記傾春碧

敘州

蓋古戎州也有東樓厨醢本名重碧范至能易爲春碧

北嶺空思擘晚紅

北嶺在福州予少時

與友人朱景參會嶺下僧舍時秋晚荔子獨晚紅在

冉冉流年霜髯外纍纍荒塚綠

燕中琳房何日金丹熟老鶴猶堪萬里風

山村經行因施藥

閒行偶復到山村父老遮畱共一樽曩日見公孫未晬如今已解牧鷄豚

逆旅人家近野橋偶因秣蹇暫逍遙村翁不解讀本草爭就先生辨藥苗

歎老

身歷遄回事萬端天教林下養衰殘文編似是他人作書卷如曾隔世觀久已悠悠置恩怨况能一一記悲歡牀頭周易真良藥不是書生強自寬

戲遣老懷

平生碌碌本無奇，况是年垂九十時。
阿囷略如郎罷老，釋孫能伴太翁嬉。
花前騎竹強名馬，階下埋盆便作池。
一笑不妨閒過日，歎衰憂歎却成癡。

舊襲家風號散人，晚承恩詔賜閒身。
放狂泥酒都忘老，厚價收書不似貧。
霜曉方驚羣木脫，春晴又喜一花新。
先生偶出人難遇，陌上爭先看角巾。

新晴

夜雨空階滴到明，山雲忽斂作新晴。
門前月淡有簷影，牆外泥乾無屐聲。
與世日疎愁易遣，入春得暝疾差平。
便當剡作滄洲趣，寄語沙鷗勿敗盟。

新歲

改歲鍾馗在依然舊綠襦老庖供餽飪跣婢喫屠蘇載糗
送窮鬼扶箕迎紫姑兒童欺老瞶明燭聚呼盧

新曆歎

新曆在手心怕開日月連翩相續來黃金散盡自一快白
髮不貸真可哀無爲健美廣成子千二百歲終有死膠不
可黏西去日刀何由翦東流水酒無醇醑但痛飲市醞上
尊俱醉耳堂堂七尺死卽休不飽烏鳶飽螻螳

東籬

漫道溪居晝掩關東籬栽接不曾閒每因清夢遊敷水自
覺前身隱華山花發時時攜綠酒客來往往羨朱顏藥爐
安著猶無地擬展茆茨一兩間

東偏隙地作疎籬遇興無非一笑時陪客投壺新罰酒與

兒鬪草又輸詩山桃溪杏栽俱活藥鑱漁竿動自隨家事
猶令罷關白固應黜陟不曾知

村夜

入春雨雪無休日雨止猶陰未快晴萬竅怒號風不定半
輪斜照月微明百年辛苦農桑業五處睽離父子情但得
平安已爲幸孤燈殘火過三更

時子虞調官行在子龍阻風西陵子修在闕子坦在海昌子與子布子適守舍

夢中作

世事何由可控搏故山歸臥有餘歡澗泉見底藥根瘦石
室生雲丹竈寒人遠忽聞清獻起山閒頻得異書看一朝
出赴安期約萬里煙霄駕紫鸞

新晴

寂寂房櫳鳥雀聲熏籠茶竈正施行繁花滿樹春纔半斜
日穿雲雨乍晴引睡書橫猶在架圍棋客散但空枰病懷
莫道傷幽獨小榼芳醪手自傾

挂冠湖上遂吾初捫腹消搖適有餘羹煮野蔬元足味屋
茨生草亦安居市壚分熟通賒酒鄰舍情深許借驢更喜
新晴滿窗日籤題重整一牀書

春日雜賦

羈懷病息正厭厭詩卷漁竿信手拈老境何嘗忘一笑春
風也解到窮閭殘花滿地無餘萼新筍掀泥已露尖轉老
轉窮君勿笑熊蟠魚腹豈容兼

鬢毛八九已成霜此際逢春只自傷苦雨不容花抵敵餘
寒猶賴酒禁當退紅衣焙熏香冷古錦詩囊覓句忙堪笑

散人閒事業西窗容易又斜陽

唐樂府云牀上小熏籠韶州新退紅

江湖放浪水雲人藥物枝梧夢幻身移竹南窗初試筍埽花北陌旋成塵窮忙自笑常終日老健猶能不負春未遂初心惟一事乞薪賒米惱吾鄰

乞得身歸剡曲邊衡門茆舍其蕭然向來誤計守書冊此日遣愁無酒錢俗客妬閒來袞袞流年欺老去翩翩梨花楊柳清明過且向江頭剝放顛

梅市算歸三山

白日蠻童佩一壺壺乾時亦復村酤橫林露塢遠猶見暮靄籠山淡欲無綠浦例憑蓀作界画橈常遣鷺前驅此身元是滄浪客敢學高人乞鏡湖

春晚

村巷泥濘晝掩門倚闌搔首一消魂花經風雨人方惜士
在江湖道更尊擘浪忽看魚對躍入雲時見鶴孤鶩向來
幸渭今安在歎息誰能起九原

雜感

早仕讒銷骨遲歸悔噬臍短衣猶掩脛窮巷固多泥婢喜
蚕三幼鄉中謂蚕眠爲幼奴貪雨一犁衡茆明我眼刮膜謝金篦
春晚晴還雨杯深醉復醒溪添半篙綠山可一窗青藥品
隨長鑱花名記小屏閒身幸無事吟嘯送餘齡

雜題

半飽半飢窮境界知晴知雨病形骸軒昂似鶴那求料枯
槁如僧不赴齋

大兒都門久栖栖小兒調官今復西鄰家父子我所羨泥

水沒膝扶畊犁

出遊歸鞍上口占

渺渺煙波飛槳去迢迢野徑策驢還寄懷楚水吳山外得
意唐詩晉帖間每惜好春如我老誰能長日伴人閒世間
自是無兼得勛業元非造物慳

雨

曉望橫斜映水亭暮看飄灑溼簾旌不嫌平野蒼茫色實
厭空階點滴聲上策莫如常熟睡少安毋躁會當晴且將
穡事傳童稚未插秧時正好畊

初夏閒居

雲液初筩小瓮香風漪乍展北窗涼巢乾燕乳蟲供哺花
過蜂閒蜜滿房閉戶不知春已去鈔書但覺日方長所嗟